



Il «Chorus», il magazin per ils chors svizzers, vegn remplazzà entras ina circulara electronica.

FOTO G. N. STGIER

Nagina gasetta pli per ils chors

Uniun svizra dals chors

DA GION NUTEGN STGIER / ANR

■ Il «Chorus», il magazin da l'Uniun svizra dals chors, è istorgia. Ils davos 11 onns è la gasetta per ils chors cumparida mintga sis emnas e quai er cun ina part rumantscha. L'uniun tetgala dals chors svizzers ha problems finanzials e quai è ina raschun ch'i dat betg pli il «Chorus». Tuts quels che han spegà l'emprima ediziun 2014 dal «Chorus» han fatg quai per nagut. En il davos «Chorus», quel dal december 2013, ha l'Uniun svizra dals chors comunità ch'i dettia nagin magazin pli per noss chors. Il 2002 è il «Chorus» vegnì introducì sco successur da la «Chorzeitung» e cumpari è lura il magazin en tuttas quatter linguas naziunalas. Dapi il 1977 exista l'Uniun svizra dals chors e quai sco successura da la Federaziun naziunala dals chantadurs, fundada il 1842. Da

preschent appartegnan a l'uniun 2000 chors cun radund 60 000 chantaduras e chantadurs. Da quel dumber derivan 140 chors da noss chantun. La finamira da l'uniun è cunzunt da promover en Svizra il chant e da sustegnair ils chors en lur activitads. Il Grischun è represchentà en la direenziun da l'uniun entras *Andreas Gabriel* che segna per la comunicaziun da quella.

Divers redactors per la part rumantscha

Ils davos 11 onns èn trais persunas stadas responsablas per la redacziun dals «Chorus» ed il davos schefredactor è stà *Beat Holdener*. Per la part franzosa è stà responsabel *Thierry Dagon* e *Christian Barella* è stà il redactor per las regiuns talianas da noss pajais. En quels 11 onns han er intgins redactors da la Rumantschia scrit per la part rumantscha lur

artitgels. Quai èn tranter auter stads *Giusep Giunanin Decurtins*, *Augustin Beeli* ed il scribent da quellas lingias. Natiralmain han er anc autras persunas contribuì che nosssa lingua era represchentada en las ediziuns dal «Chorus». Per la redacziun rumantscha dals davos «Chorus» è stà responsabel *Andreas Gabriel*. Ussa vegn il «Chorus» remplazzà entras in «Newsletter» electronic, quai cunzunt pervia dals custs. Per sanar la cassa da l'Uniun svizra dals chors èn necessarias differentas mesiras da spargn ed ina da quellas è da renunziar en l'avvenir a l'ediziun dal «Chorus». Ultra da quai pajan ils chors da nov otg francs contribuiziun annuala per mintga chantatur e chantadura enstagl quatter francs. Per reducir ils custs vul l'uniun er spargnar tar las sedutas da la direenziun e tar las spensas dals commembers da la suprastanza centrala.